

Karenm 2022

Kontribisyon Levek pour en disernman koman en Legliz

Detrwa refleksyon pour nou lamars ver Pak.

Ser zanmi,

Mon oule propoz zot sa detrwa refleksyon, fri mon meditasyon. I en kontribisyon pour nou disernman, nou lapriyer, la ki nou pe komans nou lamars ver Pak. Ki, pandan sa letan karenm, nou annan lazwa pou les nou ganny renouvle par Senyer, pour ki nou kapab vin bann meyer temwen Zezi.

1. Sertenman Sesel in eksperyans en gran devlopman ekonomik depi bann lannen apre lendepandans.

1.a Sa devlopman ekonomik in anmenn en vre amelyorasyon dan kondisyon lavi pour lamazorite popilasyon : plis konfor materyel, sorti dan lamizer nwanr, (travay pou ganny manze tanto!) ledikasyon pour tou, meyer swen lasante, pansyon retret pour tou, valorizasyon lalang ek kiltir kreol, louvertir lo lemondn eksteryer gras a televizyon, voyaz a letranze ensi ki devlopman teknolozi enformatik. Pli enportan, Seselwa in pran zot desten dan zot lanmen dan tou sekter sosyete Seselwa.

1.b Sa sosyete ki pe grandi in osi eksperyans bouwersman ek soufrans lo ki nou'n konn plis apre ki nou'n ekout bann temwanyaz atraver 'Konmisyon Lazistis ek Rekonsilyasyon'.

2. Nou pa kapab **pa konstata** ki dan leker nou sosyete ki pe devlope (ki vre dan tou sosyete) nou pe eksperyans en lafyev, ki son bann sentonm prensipal, parmi lezot i :

En poursantaz enportan nou popilasyon i lesklav bann adiksyon, prensipalman, drog, lalkol ek bann zwe lasans (gambling).

Nou fanmiy i vin pli frazil akoz vyolans, diferan laform labi, ki enkli labi lo miner; seksyalite ki pa ganny pran o seye e brouyaz bann reper.

En logmantasyo dan kriminalite i enkyetan e malerezman nou antann sa tro souvan dan nouvel lo televizyon oubyen lo radyo.

Fason ki nou viv ansanm dan bann diferan konteks (manze, langaz, labita etc.) setadir nou kiltir kreol, i ganny menase par bann divan mondyalizasyon.

3. Nou **pa kapab**, non pli, **pa demann nou lekor kestyon** : ki lakoz sa bann sentonm? Ki rezon sa bann malez?

Eski i relye a sa lakours fol pour konsomasyon? Bann tanp konsomasyon ek shopping i paret pli atiran ki bann legliz!

Eski i relye a en model lasosyete kot laparans, *lanmizman*, sa ki nou gannyen toudswit, konpetisyon ekzazere par rapor a mon vwazen, mon koleg travay etc. in vin par lao nou valer tradisyonnal tel ki: zefor, prensip lavi, lapartaz...

Eski i relye avek lefe ki sa konpetisyon ekksesif i fer ki bann bezwen (ki pa esansyel) i vin touzour pli enportan pou satisfer e a nenport ki pri, menm si sa i enplik vann ou nanm avek dyab kot, par ekzanp ou vin en marsan drog, donk en marsan lanmor?

Eski i annan en lyen ant sa vid ki ekziste - en lavi ki napa sans, ki'n ganny redwir a konsomasyon - ek bann labi ki nou war dan nou fanmiy e dan diferan kous lasosyete?

3. a. Nou kot en karfour dan nou listwar. Nou swa (**ou** swa ki nou pa fer) i annan en gran lenpak lo lasosyete dan ki nou oule viv e ki nou oule les pour bann zenerasyon ki pou vini.

Me parey en teolozyen i fer remarke : « *Fodre nou konsernen avek plannet ki nou les pour nou zanfan me osi zanfan ki nou les pour sa plannet.* »

4. Byen sir Kominote kretyen i o sant sa melanz imen e non pa a kote ou par lao ! Parey sa teks Konsil Vatikan II i fer nou rapel : « *bann lazwa ek lespwar, latristes ek langwas zonn ozordi, sirtou bann pov e bann ki pe soufer, i osi bann lazwa e lespwar, latristes e langwas bann disip Zezi* ». (Gaudium et Spes.)

4.a Legliz Katolik isi Sesel, atraver lenvitasyon Lepap François, parey bann lezot Legliz, pe viv aktyelman en sinod lo sinodalite.

En Legliz sinodal i en Legliz kot napa sef en kote e lot kote bann ki swiv.

En Legliz sinodal i en kominote krwayan, en pep ki pe marse, afen ki zot fer en disernman dan Lespri Sen sa ki Zezi i oule nou fer pou vin disel son Levanzil dan sa lapat imen, setadir dan sakenn nou fanmiy, dan fanmiy-Legliz e dan sa gran fanmiy lasosyete Seselwa.

En Legliz sinodal i en lekor kot Zezi i latet e sak batize en manm - en bann pli enportan ki lezot - e kot levek ek bann minis ki'n ganny ordonnen i bann senp serviter. Nou bezwen soutyen kanmarad, menm bann manm ki pli frazil e feb, pour ki nou avanse dan nou lamars.

4.b. Premye letap ti tre enportan, aköz san en minimonm 'self-esteem' en dimoun, en fanmoy ou en kominote imen, pou annan bokou difikilte pou avanse. Si toulazournen nou dir en dimoun ki i en zero, i riske krwar ki i pa vo nanryen! Koman krwayan i telman enportan pou rekonnet ki nou annan valer dan lizye Bondye e ki, avek tou nou frazilite ek febles, Senyer i avek nou pou ed nou pou fer bann *pti lepa - pti lepa*.

4.c Donk, apre en premye letap byen enportan kot nou'n pran letan pou pran konsyans tou bann letap positif ki nou'n viv dan nou fanmiy, dan fanmiy-Legliz, dan sa gran fanmiy lasosyete Seselwa, e apre ki nou'n rann gras Senyer pour prezans e lakonpanyman Zezi - Emanouel, nou abord letap swivan.

4.d. Avek letan karenm, nou antre dan en nouvo letap nou lamars sinodal.

Karenm i en **loportinite**. Avek Senyer nou kapab fer en nouvo depar en rekomans nou lamars, menm si i otreman.

Nou ganny envite pou demann nou lekor en senp kestyon « *Avek lankourazman ek lafors Bondye, ki bann konversyon ki nou ganny apele pou viv pou vin en pli bon temwen Zezi ?* »

Wi, ki bann konversyon nou pou viv *dan sakenn nou fanmiy, dan fanmiy-Legliz, e dan sa gran fanmiy lasosyete Seselwa* pour ki nou pli lib, pli responsab, pli fraternel?

Mon ankouraz zot personnelman me osi an group (an fanmiy, ant koleg travay ou ant zanmi, dan bann group sinodal) pou poz zot lekor kestyon, pou pran laparol e partaz avek nou (lekip responsab sinod) zot bann refleksyon. (Ladres: Mlle Maryvonne Gabriel : PO Box 43, Victoria, Mahé; email secretarycc@email.sc). Sak partaz i tre enportan pour nou disernman : kwa ki Zezi i ekspekte nou fer, isi Sesel?

5. Dan sa letan karenm, mon envit nou pou replonz dan lasours vivan Lekritir Sent

pou antre an konvèrsasyon avèk nou Senyer. Ensi, san neglig bann lezot analiz, nou kapab ganny benefis en resous enportan (Parol Bondye) pou al kot rasin nou bann problem, nou bann lerer, **me sirtou**, avèk led Senyer ek partisipasyon tou dimoun, pou re-envant demen.

Pour sa, mon propoz zot pou medite bann lektir ki litirzi i propoz nou sak Dimans karenm.

5.1 Premye Dimans karenm: Lik 4 vs 1-13

Zezi i ganny konfronte avèk 3 tantasyon fondamantal ki rasin bann fleo ki bles profondeman nou lavi personnel ek dan lasosyete.

Demon i oule detourn nou avèk semen boner. I sa manter. Sa ki grav dan pese, se pa dezobeir bann lareg moral me ler nou detournen avèk semen sikse nou lavi.

Ler i repous premye tantasyon, Zezi i dir avèk demon : *'Zonm pa viv **selman** lo dipen.'*

Evidaman tou dimoun i bezwen dipen e resers byennet pa merit ganny kondannen, zis parey partaz en bon repa an fanmiy ou avèk zanmi! Mo enportan dan warning Zezi, i sanble **SELMAN**. Lavi pa SELMAN manze, bwar, anmize. Gourmandiz (lakours pou konsonm tou kalite keksoz) , 'lust' (lanmizman zis pour anmize) i bann kanser dan nou lavi.

Dezyenm tantasyon i tantasyon annan, parey demon i sizere : 'annan tou' e sa a nenport ki pri, menm prostern nou devan li. Nou ganny tante pou vann nou konsyans, nou lekor, nou lanm avèk demon pou ganny larzan fasil e ensi satisfè nou laswaf ankor touzour plis!

Trwazyenm tantasyon i tantasyon 'fatalisme', en larelizyon mazik. « *Zet ou anbabann lanz pou anmenn ou lo zot lanmen...* » Olye war bann problem an fas e pran nou responsabilite avèk lafors Bondye, nou tourn ver bann pratik siperstisye, bann seans pous *nanm*, kot nou pa pran responsabilite, menm si sa i donn nou en ilizyon soulazman.

Zezi i pli for ki lemal. Avèk lafors Lespri-Sen pese pa en fatalite. Pese pa imen. Pese se renons nou limanite.

5.2. Dezyenm Dimans karenm: Lik 9 vs 28-36

Dan sa dezyenm Dimans karenm, nou ganny envite pou vin bann temwen, parey Pyer, Zak ek Zan, leksperyans transfigirasyon ki Zezi in viv lo montanny.

Dan Labib, montanny i en landrwa privezye pour rankontre Bondye. Parmi lezot, annou mazin Moiz, profet Eli.

Dan leker en relasyon ki ganny fer dan konfyans total dan Bondye son Papa, Zezi i ganny transfigire. Parey lalimyer i fer resorti diferan kouler en vitray, relasyon Zezi avèk son papa i en lalimyer ki fer nou dekouver lekel Zezi : « *Sa i mon garson byenneme...ekout li.* »

Nou osi, pandan sa karenm, swivan lenvitasyon Zezi, nou ganny envite pou mont 'lo montanny'. Avèk nou bann frer dan lafwa, par letan pase dan konpani Zezi dan silans, an ekoutan son Parol, an kozan avèk li lo tou nou lavi, nou ganny envite pou antre dan dinamik son relasyon avèk Bondye son papa. Dan leker sa leker dan leker, menm si i annan labou lo nou leker, les nou ganny transfigire. Alor, pli transparan a lalimyer Bondye, nou pou kapab, en fwa ki nou'n desann sorti lo montanny, pou pourswiv, dan lazwa, nou lamars imen, me otreman.

5.3 Trwazyenm Dimans karenm : Lik 13 vs 1-9

Pour Labib, Bondye pa anvoy malediksyon. Masak bann Galileen par Pilat, ler latour Siloe ti tonbe, ti provok lanmor 18 dimoun, pa ti en pinisyon Bondye. Se sa ki Zezi i dir nou dan

levanzil ki nou pou tande sa trwazyenm Dimans karenm.

Sa Bondye ki fer nou konn li dan Labib i en Bondye ki war lamizer son pep. En Bondye ki soufer ler son pep i soufer. En Bondye ki oule liber nou dan nou lesklavaz letan modern : lesklavaz adiksyon tel ki pornografi, siperstisyon, ek lapriyer mazik, larzan ki nou gannyen a nenport ki pri.

Bondye i en Bondye ki annan pasyans anver nou. I la dan nou kote. I atrap nou lanmen. I envit nou pou konverti pour ki nou lavi pa vin en lanfer. I annan konfyans dan nou e nou kapasite pou sanze, me parey Sen Augustin i dir nou : « *Bondye in kree nou san nou, me i pa oule sov nou san nou.* »

Lapriyer kretyen i pa en enkantasyon mazik. Priye se akeyir Bondye ki en Abba (en papa avek leker en manman) parey Zezi i dir nou.

Dan sa letan karenm annou demann Lespri Sen lazwa pou viv lakonversyon an tan ki fanmiy, Fanmiy-Legliz e dan sa gran fanmiy-lasosyete Seselwa. Avek tou nou laliberte imen, annou les nou ganny libere par Bondye Papa ki vin sov nou par lanmor e larezireksyon Zezi.

5.4 Katriyenm Dimans karenm : Lik 15 vs 1-32

Bondye i vin rod nou parey sa papa i al rod son de garson - sa pli zenn e lene - dan levanzil ki nou ganny envite pou medite sa katriyenm Dimans karenm.

Ase souvan nou dir ki nou pe rod Bondye. I pa fo ! Pourtan, pour lafwa kretyen, se touzour Bondye ki pran linisyativ e ki, premye, vin rod nou. Se aköz Bondye i rod nou ki nou rod li.

Dan parabol sa Papa ki ranpli avek lanmour, i annan de garson. Tre probableman nou (personnelman me osi an tan ki kominote kretyen) parey sa de garson!

Parfwa, nou parey sa pli zenn garson. Nou krwar, menm si nou pa avoue ofisyelman, ki pli lwen ki nou ete avek Bondye, nou pou pli lib pou viv nou lavi plenman. Bondye avek son bann komannman i ganny war koman en baryer pour nou lazwa de viv. Fodre rekonnet ki parfwa nou kominote kretyen i prezant en figir en pe tris - *'figir boude e sever'* e serten mouvman relizye i fer 'marketing' pou rod manm, san ezite pou 'profit' lo soufrans dimoun. Pour bokou, semen an deor larelizyon i sanble pli gou! Lo lot kote, parey sa pli zenn garson nou annan en relasyon kot nou ganny tou sa ki nou oule avek Bondye. Pli souvan nou priy li pou fer bann demann ! Parey sa pli zenn garson, nou retournen ler nou napa lezot solisyon - *Ki wa fer!*

Lezot fwa nou parey lene garson. Nou annan en relasyon 'donnen - donner' avek Bondye. Mon en bon pratikan e i pa normal ki mon malad! An tan ki kominote kretyen, me osi personnelman, nou parfwa rizid. Nou annan bann parol dir pour bann ki'n egare. An bref, nou ki obei komannman (oubyen fer kwar ki nou obei zot) nou parfwa parey lene garson, nou pa toler bann ki'n tonbe parey sa pli zenn garson. Nou pa parey sa bann dimoun... ki ador zidol, visye, manter !

Bonn nouvel se ki papa dan sa parabol i sorti e al zwenn son de garson. Pareyman, gratwitman aköz i kontan nou, Bondye i vin zwenn nou. Bondye i envit nou pou annan lazwa e pou selebre. Dan sa letan karenm, annou les Bondye ser nou dan son lebra e annou dans nou lavi lo ritm Levanzil. Annou vin en Legliz an mouvman e swiv legzanp Bondye.

5.5 Senkyenm Dimans karenm: Zan 8, 1-11

Ki Bonn Nouvel (Levanzil) nou ganny envite pou ekoute bomaten ? Zis parey i ti dir sa fanm adilter, Zezi i dir sakenn de nou, a sakenn nou fanmiy ensi ki nou kominote kretyen : « *Alor mwan osi, mon pa kondann ou. Ale, me pa bezwen fer pese ankor.* »

Sa sinod ki nou pe viv i envit nou a laverite. Rekonnet ki nou adilter, pa pou imilye nou, me pou tann ankor sa bann parol Zezi. *'Mon pa kondann ou'*. Bondye i pardonn tou nou idolatri, setadir bann fo bondye larzan a nenport pri, fo bondye konsonmasyon an tro, seksyalite ki pa serye. Bondye i liber nou, gratwitman e par son pardon, avek tou nou demon ki anmenn nou dan larin. *'Ale, me pa bezwen fer pese ankor.'* Bonn Nouvel ! Bondye i kwar dan nou. Avek son soutyen, Zezi (sakenn de nou me osi nou kominote) i kwar dan nou kapasite pou sanze, pou relev nou e viv en lavi vreman imen.

Bokou lapidasyon i ganny viv toulezour e 'live' a traver rezo sosyal. Ki kantite dimoun i ganny tourmante par bann move parol ou par bann portre degradan! Ki kantite dimoun, parey sa fanm adilter, i ganny trennen dan labou. Anonim deryer nou lekran, parfwa par nou 'like', nou akter oubyen spektater sa bann lapidasyon modern an direk.

Par nou bann mesaz blesan nou kapab fasilman e parey en 'coward' detri pa zis repitasyon en dimoun me sa dimoun limenm. Ki nou antann sa bann parol Zezi : *Sa enn parmi zot ki pa'n zanmen fer pese, anvoy premye ros lo li.* »

Byen sir, i pa kestyon denons sa bann sityasyon ki degrad limanite dan nou e otour nou. Sertenman i pa kestyon pou dir ki finalman nou tou nou koronpi. Nou tou nou pouri! Non, nou annan en devwar pour laverite ek lazistis. Lo lot kote, parey Lepap Benoît XVI i rapel nou, lasarite i depas lazistis, en lazistis ki osi neseser. Nou ganny envite, menm dan nou konba kont tou sa ki degrad bann imen, pou annan en leker mizerikordye. Nou konbat tou form prostitisyon - sa ki fer dimoun vin lesklav - me nou pa ziz sa bann prostitute.

6. Konklizyon.

Letan sinod pou promouvwar en Legliz sinodal i en letan disernman. Nou tou nou ganny envite pou port atansyon a bann realite dan nou lavi, e ekler zot avek lalimyer Levanzil e les nou ganny libere par Zezi. Ki sa letan karenm i en moman favorab, avek lafors Bondye, pou travers (Pak) de nouvo 'lanmer rouz' e pran semen laliberte, fraternite, Rwayonm Bondye.

+ Alain Harel